



**Aalisarnerup nutarterniarneqarnera qanoq naammassiniarneqarnersoq pillugu apeqqu-
teqaat aallaavigalugu oqallisissiaq.**

(Inatsisartunut ilaasortaq Ane Hansen, Inuit Ataqatigiit)

Nunarsuaq tamakkerlugu naatsorsuutigineqarpoq aalisariutit affaat isateraluaraanniluunniit pisarineqartartut tamarmik pisarineqarsinnaalluartut. Pissutissaqanngilaq eqqarsassalluni Kalaallit Nunaanni allaaserussajunnarsisoq. Aalisariutit ikilisinneqaraangata taamaasillunilu aalisarneq annikilligaangat aalisaskkat amerliartulersarput taamaasillunilu siornatulli ajornannginnerusumik pisaqartoqarsinnaalersarpoq peqataanillu aalisarneq pitsaanerulersarluni. Islandimi tamanna misigereerpaat tassani aalisarnerit amerlanerit MSC-mik aallagartaqalernikuuput, taakkulu imaani ullut ikinnerit atortarpaat pisarisartakkat amerlaqataasa pisarinissaannut.

Kisianni aalisarneq annikillisissagutsigu taava kikkut aalisarianngitsoortalissappat.

Ajornartorsiut taanna nunarsuarmi sumiikkaluaraanniluunniit atuuppoq. Sooq angerlarsimaannassaanga illit aappaagu amerlanerusunik peqasaqqullutit?

Taamaattuminguna Demokraatini isumaqartugut aalisakkat iluanaarniutigineqartartut pillugit pisassiisoqartalissasoq aamma pisassiissutit arlaatigut nioqqutigineqarsinnaanngortariaqarput. Taamaasiornikkut aalisartut pissutissaqalissapput aalisarpallaannginnissaannut pisassiissutit nalingat pigiinnarumallugu. Nalunngilarpulli inunnut ataasiakkaanut pisassiissutit tunineqarsinnaasarnerat aamma ajoquteqartoq. Pisassiissutit inunnit ikittuinnarnit pigineqalersarput aamma aalisartunngorniartarneq ajornarnerulersarpoq angallatinut pisassiissutinullu akissaqartariaqartassagamik. Taamaattuminguna piginneqatigiilluni pisassiissutinut ingerlatseqatigiiffiliornissaq pilerinartutut isigigipput.



Aalisariutit amerlavallaat aalisarunnaartikkusunngikkaanni aalisakkanik nutaanik ujarlertariaqarpugut. Kisianni qanoq? Uani piginnittuuneq aamma apeqqutaavoq. Sooq nukippassuit atussavakka aalisakkanik nutaanik aalisagassarsiorlunga, nassaakka allat takkullutik nungullugit aalisartassappatigit. Uani aaqqissuussineq amingaataavoq, qularnaarisussa aalisarnermik nutaamik ineriartortitsisut inangerneqartannginnissaannik soorlu assagiarsunniartut inangerneqarnikuunerattut.

Tamakku tamarmik peqqinnartumik landskarsimut ilapittuutaasumik aalisartoqalernissaa qularnaassavaa. Tassanili suliassaqarpoq allamik. Qanoq iliorluni aalisarnerup iluani pisuussutit naapertuuttumik ernialersorneqarsinnaappat. Sinerissamut qanittumi aalisarneq eqqarsaatigalugu akissutissaqanngilaq ajornaatumik. Avataanili aalisarneq eqqarsaatigalugu siunnersuutigissavarput paasiniarneqassasoq aalisakkat raajallu qanoq naleqarnersut. Aalisakkat pisassiissutit 5 imaluunniit 10 %-ii akitsorterullugit nioqqutigineqarsinnaapput. Taava aki eqqornerusoq ajornannginnerusumik paasissavarput Landskarsimi amingartoorutit aallaavigalugit Inatsisartut oqallinnerannut naleqqiullugu.

Taamatut oqarluta eqiigasumik oqallittoqarnissaanut qilanaarpugut.